

Lettre du magistrat d'Ypres au prince d'Orange.

Il prie le prince de nommer capitaine Simon Uutenhove.

28 août 1578.

Monseigneur,

Comme le S^r Symon Uuytenhove allant vers Vostre Ex^{co} nous ait par diverses années faict bons et léaulx services, tant au faict de la charge de capitaine que aultrement, s'estant tousjours monstré bon patriot et vray zélateur du bien et repos de nostre commune patrie tant affligée, nous ayant enoultre déclaré estre d'intention d'y persévérer et continner jusques à la dernière goutte de son sang et vie ; à ceste cause et que n'avons le moyen de l'employer ici, avons bien voulu très humblement supplier Vostre Ex^{co} affin que pour les raisons susdictes, mesmes au regard de la perte et spoliation de tous ses meubles à la surprinse dernièrement de ceste ville, le bon plaisir de Vostre Ex^{co} soit l'avoir pour recommandé et advancher à la charge de capitaine, à quoy l'avons tousjours tenu et tenons pour bien qualifié expérimenté et idoine. Ce faisant Vostre Ex^{co} nous obligera de plus en plus luy servir d'aussy bonne affection que allons priant le Créateur,

Monseigneur, donner à Vostre Ex^{co} l'accomplissement de ses nobles et vertueux dessins et qu'elle ayme le plus, nous recommandans très humblement à la bonne grace dicelle. d'Ypre ce xxviii^e d'aougst 1578.

De Vostre Ex^{co}

Très humbles et très affectionnez serviteurs, les advoé, eschevins et conseil de la dicte ville.

A Monseigneur Mons^r le prince d'Oranges.

Y. Portefeuille 12. *Minute.*